



NORMATIVA DE COMPETICIÓN 2009

Normas comúns para tódalas competicións

As normas complementarias, establecidas pola Federación Galega de Caza, para as distintas competicións, prevalecerán sobre os Regulamentos das diferentes modalidades.

Ante calquera situación non prevista nestas normas, estarase ao disposto nos regulamentos específicos de cada modalidade.

1. Cada proba deportiva anunciarase con tempo suficiente mediante o correspondente programa da competición, no que deberán figura-los seguintes apartados:

- a) Nome e categoría da proba.
- b) Lugar da celebración.
- c) Data e hora.
- d) Xurado de Competición. Nos campionatos autonómicos presidido polo Delegado Federativo da proba e os catro Representantes Provinciais.
- e) Participantes.
- f) Nº de prazas en competición para a fase seguinte.
- g) Prezo da inscrición nas competicións de participación *libre*.
- h) Lugar onde se efectuará a inscrición e data límite.
- i) Lugar do sorteo.

2. Despois de facer pública a clasificación, os participantes disporán dun receso de 15 minutos, como mínimo, para posibles reclamacións sobre as que decidirá o Xurado de Competición da proba previo depósito da cota que determine o correspondente Regulamento da Competición, no caso de que dita cantidade non estea especificamente recollida no regulamento o depósito será do dobre da cota de inscrición. Este depósito poderá recuperarse si o fallo é favorable ao reclamante.

3. As actas utilizadas en cada competición serán según modelo que facilitará ao efecto a Federación Galega de Caza, sendo o único documento válido posterior á proba, por iso os xuíces e árbitros deberán poñer a máxima dilixencia en cubrir tódolos apartados: inscritos, participantes, clasificados, etc., e reflexa-las incidencias, reclamacións, e decisións do Xurado de Competición, así como as actitudes antideportivas de participantes ou de persoas relacionadas co concurso no apartado de OBSERVACIONES que figurará nas actas de tódalas competicións.

Os xuíces e árbitros asinarán e entregarán a Acta ao Delegado Federativo da proba que será o encargado de enviala á Federación Galega de Caza, quedándose cunha copia o Responsable da Proba.

Nas competicións nas que os participantes teñan que acudir acompañados dun xuíz (caza menor, arceas e raposo), este deberá se-lo mesmo que figure na inscrición, salvo circunstancias excepcionais debidamente acreditadas, e a súa presenza será imprescindible, sendo motivo de descalificación o incumprimento deste requisito.

4. O Comité de Xuíces e Árbitros da Federación Galega de Caza, designará aos xuíces e árbitros de tódalas competicións oficiais, agás as de caza menor con Can, arceas e raposo. Os gastos de arbitraje liquidaraos directamente a sociedade organizadora aos xuíces e árbitros o mesmo día da competición.

5. A Copa Federación das diferentes modalidades deportivas pasarán a denominarse Copa Galicia. A denominación da Copa Federación quedará para aquelas probas de nova creación e/ou aquelas outras nas que non houbera unha clasificación xeral que permita o acceso a ningunha outra de rango superior.

6. O campión ou campiona dos Campionatos Galegos de tódalas modalidades deportivas, aínda que o campionato sexa de inscrición libre, defenderán o título da edición anterior; a súa inscrición correrá a cargo da FGC, e será a propia Federación Galega a encargada de convocalos.

7. Tódolos deportistas clasificados deberán confirmar ás Federacións ás que representen a súa asistencia á fase seguinte, sendo motivo de expediente o incumprimento deste requisito.



Federación Galega de Caza

- 8.** Nas competicións de inscrición *libre*, os participantes deberán formaliza-la súa inscrición ante FGC, dentro do prazo previsto no Programa da proba.
- 9.** Para cada provincia só é obrigatoria a organización do Campionato Provincial, sendo competencia desta a realización ou non de semifinais ou comarcais para a clasificación.
- 10.** No caso de que unha provincia non cubra o cupo asignado nunha proba autonómica, a Federación Galega de Caza poderá cubrir eses postos mediante repesca realizada de xeito proporcional naquelas provincias que teñan unha participación máis numerosa, sumándose, ademais do campionato provincial, as semifinais ou comarcais, se as houbera.
- 11.** Non se pode participar de xeito oficial en máis dun Campionato Provincial clasificatorio para o Campionato Galego de cada modalidade deportiva. A inclusión dun mesmo participante en máis dunha acta invalidará a súa clasificación en tódalas probas nas que participara.
- 12.** En tódalas competicións nas que se participe con cans, deberá de figurar o nº de Microchip de cadaún dos cans na folia de inscricións da proba.
- 13.** Os deportistas clasificados para a formación das diferentes Seleccións Galegas, que por motivos xustificadas non poidan participar nos respectivos Campionatos de España deberán acreditarlo fehacientemente ante a FGC no prazo que se estableza. Os deportistas que non o acrediten suficientemente enténdese que renuncian a participar coa Selección Galega indefinidamente. Se nun futuro –previa clasificación– decidiran volver a formar parte da Selección Galega, deberán solicitalo por escrito ante a FGC que á vista da súa petición resolverá.
- 14.** O nº de prazas para os campionatos autonómicos das distintas modalidades queda do xeito que se indica a continuación, tendo en conta que cada provincia contará cun mínimo de participantes, sendo o resto proporcional ao nº de licencias federativas por cada provincia.

PERCORRIDOS DE CAZA

- 12 tiradores por cada provincia e o resto proporcional ás Licencias Federativas.

Coruña	12+5 = 17
Lugo	12+4 = 16
Ourense	12+2 = 14
Pontevedra	12+6 = 18

(65 Participantes seleccións provinciais + campeón ano anterior + 2 Copa Federación 2008 + 2 clasificados da Copa Galicia 2009)

COMPAK SPORTING

- 12 tiradores por cada provincia e o resto proporcional ás Licencias Federativas.

Coruña	12+5 = 17
Lugo	12+4 = 16
Ourense	12+2 = 14
Pontevedra	12+6 = 18

(65 Participantes seleccións provinciais + campeón ano anterior)

SAN HUBERTO

- 4 concursantes por cada provincia e o resto proporcional ás Licencias Federativas.

Coruña	4+2= 6
Lugo	4+1= 5
Ourense	4+0= 4
Pontevedra	4+2= 6

(21 participantes de seleccións provinciais + campión ano anterior + 2 clasificados Copa Federación 2008 + 3 clasificados da Copa Galicia 2009)



CAZA MENOR E ARCEAS

- 4 Concursantes por provincia e o resto proporcional ás Licencias Federativas.

Coruña	4+2= 6
Lugo	4+1= 5
Ourense	4+0= 4
Pontevedra	4+2= 6

(21 Participantes seleccións provinciais + campión ano anterior)

RASTRO DE COELLO

- 2 Equipos por provincia e o resto proporcional ás Licencias Federativas.

Coruña	2+1= 3
Lugo	2+1= 3
Ourense	2+0= 2
Pontevedra	2+1= 3

(11 Equipos seleccións provinciais + campión ano anterior + 1 clasificado Copa Galicia 2009 sempre e cando se celebren un mínimo de 4 probas puntuables)

RASTRO XABARIL

- 6 Concursantes por provincia e o resto proporcional ás Licencias Federativas.

Coruña	6+4 = 10
Lugo	6+3= 9
Ourense	6+1= 7
Pontevedra	6+4= 10

(36 Participantes seleccións provinciais + campión ano anterior + 3 clasificados Copa Federación 2008 + 3 clasificados da Copa Galicia 2009)

RAPOSO

- 2 Equipos por provincia e o resto proporcional ás Licencias Federativas.

Coruña	2+2= 4
Lugo	2+1= 3
Ourense	2+1= 3
Pontevedra	2+2= 4

(14 Equipos seleccións provinciais + campión ano anterior + 1 clasificado Copa Federación 2008 + 1 clasificado pola Copa Galicia 2009)



NORMAS PARA OS CAMPIONATOS DE SAN HUBERTO

1. O Campionato Autonómico disputarase en tres campos, sacados a chou entre os participantes, se ben faranse por cabezas de serie, de tal xeito que en cada campo estean alomenos un 1º, un 2º, un 3º e un 4º clasificado dos Campionatos Provinciais. De cada campo pasarán os dous primeiros ao "barrage".
2. O Campión Galego será o vencedor do "barrage". O tempo de cada participante no "barrage" será de 10 minutos.
3. Tódolos cans teñen que estar inscritos no LOE.
4. Un mesmo deportista poderá cambiar de can nas distintas fases (provincial o autonómico), xa que nesta disciplina quen prima é o cazador e non o can.
5. Na modalidade de "Donas". A inscrición, será libre, previa participación no campionato provincial.
6. As Donas e Springers participarán nun campo independente do campionato absoluto.
7. Nos campionatos clasificatorios nos que un dos participantes xa estea clasificado para a fase seguinte (rango superior), non ocupará praza na clasificación xeral da proba, ocupando a súa praza o seguinte clasificado do seu campo.
8. No resto de probas, unha vez realizada a clasificación do barrage, o seguinte clasificado, será o do campo campión, para continuar polos campos seguintes, en sentido ascendente. Exemplo: Campo Campeón "B" seguinte clasificado o do campo "B", para continuar ao "C", si houberse "D" ao "D", e continuar con o "A", "B", "C", e así sucesivamente.
9. Nas probas abertas, por libre, onde exista un campo de oficiais e alomenos outro máis (aberto) non se decidirá o campión e subcampión provincial ata remata-lo barrage.

NORMAS PARA OS CAMPIONATOS DE PERCORRIDOS DE CAZA E COMPAK SPORTING

1. Será Campión Galego o mellor clasificado no campionato autonómico.
2. Para conforma-la selección que represente a Galicia no Campionato de España clasificaranse directamente do Campionato Galego a metade (ou a metade máis un, se o nº de prazas é impar). Os restantes postos serán cubertos por aqueles tiradores que acaden as puntuación máis altas da suma dos campionatos provinciais a razón de 16 ao 1º, 15 ao 2º, 14 ao 3º, 13 ao 4º, 12 ao 5º, 11 ao 6º e así sucesivamente, e do autonómico con 16 x 3=48 ao 1º, 15 x 3= 45 ao 2º, 14 x 3=42 ao 3º, 13 x 3=39 ao 4º, e así sucesivamente.
3. Cando no resultado da suma de puntuacións se produza un empate, prevalecerá a mellor clasificación no campionato autonómico.
4. Para a entrega de trofeos na proba autonómica só se terá en conta a clasificación acadada nesta proba.
5. O Campionato Autonómico disputarase a 150 pratos. Tanto os campionatos provinciais como o galego serán de participación libre, tendo dereito a premio calquera tirador que abonara a mesma inscrición que os tiradores oficiais. Só terán dereito a clasificación os tiradores da provincia, no caso de campionatos provinciais e os seleccionados de cada provincia no caso do galego.
6. Cantaranse só os "ceros". Ao finaliza-la intervención de cada escuadra, en cada posto, o árbitro "cantará" os pratos escachados por cada tirador.
7. Ao rematala intervención en cada campo os tiradores deberán asinalas planillas de puntuación. O tirador que non asine a planilla entenderase que acepta o resultado reflexado na mesma polo árbitro do campo, non podendo reclamar con posterioridade en canto ao resultado obtido nese percorrido.
9. Ao campión do ano anterior, se non participou no Campionato Provincial, asignaráselle unha puntuación para esta proba igual ao posto que acade no autonómico.



**Federación Galega
de Caza**

NORMAS PARA A COPA GALICIA DE CANS DE PARADA (Caza Práctica)

1. A selección de Galicia estará formada polos catro primeiros cans de Razas Británicas e os catro primeiros de Razas Continentais clasificados pola suma das puntuacións das seguintes probas:

- COPA GALICIA DE OURENSE.
- COPA GALICIA DE PONTEVEDRA.
- TROFEO CIDADE DE LUGO.
- CAMPIONATO FEDERACIÓN DA CORUÑA
- COPA GALICIA.

2. Para representar a Galicia no Campionato de España tanto o conductor como o propietario do can deben ser galegos. A estes efectos enténdese como galego aquel que acode representando a unha sociedade de caza inscrita no rexistro da FGC.

3. Puntuacións:

CACT o CACIT	12 Puntos (*)
RCACT o RCACIT	11 Puntos (*)
EXCELENTE 1º	10 Puntos
EXCELENTE 2º	9 Puntos
EXCELENTE 3º	8 Puntos
Demas Excelentes	7 Puntos
MOI BO	4 Puntos
BO	Sen puntuar

(*) Sempre que as probas teñan esta validez, previa autorización da Real Sociedade Canina Española.

4. En caso de empate prevalecerá a calificación máis alta acadada nalgunha destas probas. Se persistira o empate celebraríase un "barrage" ao finaliza-la Copa Galicia.

5. Tódolos cans teñen que estar inscritos no LOE.

6. Naqueles campionatos en que estea en xogo un CACT ou CACIT deberán terse en conta a normativa da RSCCE ou FCI a estes efectos.

7. Recibirán Placa de campión, o campión galego de Razas Británicas e o campión galego de Continentais trala celebración da Copa Galicia, unha vez sumadas as puntuacións acadadas nas distintas competicións previas (provinciais e autonómico).

8. Os campións da Copa Galicia de Británicas e Continentais serán os campións da proba, mesmo podendo esta quedar deserta, polo que a data de entrega das placas correspondentes determinará a Federación.

NORMAS PARA OS CAMPIONATOS DE CAZA MENOR E ARCEAS

1. Tanto o Campionato Provincial como o Autonómico disputarase mediante proba de campo, con caza silvestre. No caso de que algunha Federación Provincial tivera a necesidade de celebrar campionatos comarcais ou semifinais, estes poderanse realizar en Campos de Prácticas Cinexéticas sobre caza procedente de granxa autorizada. Considerarase tamén caza salvaxe ou caza silvestre, dun xeito extraordinario, aquela caza sementada alomenos cun mes de antelación á celebración da proba.

2. A duración da competición non deberá exceder de cinco horas.

3. Durante a competición cada concursante poderá utilizar un máximo de 15 cartuchos.

4. Só se poden cazar as especies contempladas como tales na Orde Anual de Vedas; nembargantes, a organización da proba pode establece-la prohibición de abatir algunha destas e/ou limita-lo número de capturas, por razón de escaseza ou polo cumprimento do Plano de Aproveitamento Cinexético.

5. O número de pezas e especies que pode abatir cada concursante deberá especificalo o Director da Proba ao comenzo da competición.



6. As puntuacións das diferentes especies realizaranse conforme ao baremo que establece o Regulamento da Federación Española.
7. Os deportistas que cobren ou non pezas ao longo da competición non poderán entrar no control ata que non se supere o ecuador da proba ou tivera completado o cupo de caza establecido pola organización.
8. Os participantes que non cobraron pezas, non puntuarán, salvo que non houbera suficientes clasificados; neste caso clasificaríanse por sorteo.
9. Tódolos Cans que participen no Campionato Galego deberán de estar inscritos no L.O.F.E.C ou LOE .
10. En caso de empate clasificarase en primeiro lugar o deportista que houbese abatido a peza máis tarde. De persistir o empate a clasificación realizarase polo turno de entrada no control.
11. O director da proba poderá autorizar o uso do vehículo para un único desprazamento de ida e volta, dende o lugar de saída ata ao cazadeiro e retorno ao control, nunca para desprazarse pola zona de caza.

NORMAS PARA OS CAMPIONATOS DE CANS DE RASTRO

1. Estarase ao contemplado no Regulamento oficial para as probas de Cans de Rastro agás os seguintes artigos que quedan redactados como segue:
 - Art. 17. Unicamente se admitirán, para acada-la Cartilla de Traballo, os cans con idades comprendidas entre os 10 meses e os 8 anos.
 - Art. 20 e 21. Substitución da palabra deberá(n) pola palabra poderá(n).
 - Artigo 5: deberá dicir: "TAN" TEXT DE APTITUDES NATURAIS. Será atribuído ao can que non sen outra oportunidade, demostre o seu instinto cazando calquera animal que non fose imposto pola proba.
 - Artigo 15: deberá dicir: En caso de forza maior, a organización resérvase o dereito a suspende-las probas e a devolve-la parte dos dereitos de inscrición, e a conserva-la parte proporcional das que xa tivese realizado.
 - Artigo 25: Deberá dicir: O sorteo dos campos servirá só como indicación do camiño que teñen que segui-los cans, e os xuíces serán os que determinen a zona a bater ou mesmo o seu cambio.
2. Nos campionatos oficiais entregaranse dous títulos: un, para o lote de cans campións, e outro, para o can campión.
3. Para participar no Campionato Galego os cans deberán estar inscritos no LOFEC ou LOE.
4. Os conductores dos lotes participantes, levaran os cans atraelados ate o xuíz, para a comprobación da identidade dos mesmos. A solta produciase no momento que decida o xuíz. Unha vez finalizado o tempo do lote o conductor recollerá os cans e sacaraos atraelados do campo.
5. Ningún can poderá participar en mais dun campionato provincial.
6. Nos campionatos, no caso de haber limitación de prazas, primeiro inscribírase un lote de cada propietario; a continuación un segundo lote, e así sucesivamente ata completar as prazas.
7. Cada lote deberá inscribírase cun conductor que durante a proba deberá actuar como tal.
8. Créase a modalidade "CARA DE CAN". Os participantes competirán cun can por espazo dunha hora, cun ou dous participantes no mesmo campo, según o sorteo realizado. Do campo pasará a ronda o can que máis puntuación acadade, na que volverá a competir nas mesmas condicións ata chegar á final, según a tarxeta de puntuación.



NORMAS PARA OS CAMPIONATOS DE RAPOSO

A competición de Raposo para Cans de Rastro ten por obxecto fomenta-la camaradería e a sociabilidade deportiva entre aqueles cazadores desta especie xunguidos por esta afección.

1. A competición do Raposo rexerese pola normativa de Caza Menor agás as normas seguintes:

- a) Neste campionato o raposo é a única peza cazable.
- b) A participación será por equipos. Cada equipo estará composto por 9 cazadores e un xuíz.
- c) A competición efectiva durará un máximo de 6 horas. Habilitarase o tempo necesario en cada competición para a saída e chegada dende os campos ao control.
- d) Os empates entre equipos resolveranse por sorteo.
- e) Só se permite usa-lo coche para desprazarse do lugar de concentración ao lugar da proba e ao retorno.
- f) O director da proba poderá autoriza-lo uso do vehículo noutros casos, se circunstancias especiais así o aconsellan.
- g) A organización terá que establecer tantas zonas como equipos houbera inscritos, de xeito que se permita cazar con amplitude.
- h) Queda limitado o número de cans por cuadrilla a un mínimo de dous e un máximo de dez.
- i) O uso das emisoras farase con emisoras autorizadas para o exercicio da caza, según criterio do Director da Proba.
- j) Os raposos abatidos serán identificados a través dun distintivo no que conste o nome do cazador que o abateu e a hora da morte, debendo ser verificada esta anotación polo xuíz.
- k) Non serán admitidos os raposos que debido ás excesivas lesións non se lles poida face-la oportuna inspección veterinaria.
- l) Se o comité técnico dictamina que unha peza non foi abatida legalmente no tempo da cacería, e así o ratifica o xurado da competición, o equipo quedará descalificado na proba.

NORMAS PARA OS CAMPIONATOS DE CETRERÍA

As competicións serán de inscrición libre.

1. BAIXO VOO.-

Nesta modalidade ante a imposibilidade de celebra-la competición con lebre, tal e como determina o Regulamento de Competicións, poderanse realiza-los campionatos con calquera especie susceptible de ser cazada (exemplo: faisán), por tanto non se considerará na modalidade de Baixo Voo "lebre ao lance" recollido no apartado 6 do vixente regulamento.

A competición desenvolverase sobre unha ave por participante.

En caso de empate procederase a realiza-la clasificación atendendo ás puntuacións acadadas nos distintos apartados:

- 1º global lance
- 2º ave-cetreiro
- 3º captura-retención
- 4º voo sobre a presa
- 5º aptitude de caza.



2. SKY TRIAL.-

Nesta modalidade a realización do lance antes dos dez minutos regulamentarios, pero despois dos cinco primeiros, terá unha bonificación dun punto por minuto.

En caso de empates procederáse de igual xeito que en Baixo Voo.

Na altura seguirase o seguinte baremo sempre que se poidan utilizar elementos de telemetría; de non ser posible a utilización destes seguirase o Regulamento da modalidade.

ALTURA BAIXA	
DE 0 a 50 metros	0 Puntos
De 51 a 75 metros	1 punto
De 75 a 100 metros	2 puntos
ALTURA MEDIA	
De 101 a 125 metros	3 puntos
De 126 a 150 metros	4 puntos
De 151 a 175 metros	5 puntos
De 176 a 200 metros	6 puntos
GRAN ALTURA	
De 201 a 225 metros	7 puntos
De 226 a 250 metros	8 puntos
De 251 a 275 metros	9 puntos
De 300 en diante	10 puntos
* Con máis de 300 mts, compensarase no global lance	

3. ALTANERÍA CON CAN.-

Esta modalidade desenvolverase conforme ao establecido no vixente Regulamento da Real Federación Española de Caza.

4. COPA FEDERACIÓN MODALIDAD PEQUENAS AVES.

A Copa Federación de pequenas aves rexeráse polos regulamentos de Sky Trial ou polo Baixo Voo segundo a inscrición.

NORMAS PARA OS CAMPIONATOS DE PAXARILES

Normas que regularán os campionatos de Paxariles da Federación Galega de Caza.

• **DESENVOLVEMENTO DAS PROBAS:**

1. A orde de actuación dos paxaros participantes farase por sorteo, procurando evitar que nunha mesma quenda participe máis dun exemplar do mesmo dono.
2. As quendas estarán compostas dun máximo de catro exemplares e dun mínimo de dous.
3. Se efectuada a división das quendas resultara que a última quedara composta por un solo paxaro; procederáse de xeito que da quenda inmediatamente anterior se retirara o paxaro de maior número de orde e trasladarase a esta última.
4. As perchas de colgar as gaiolas terán unha altura máxima de 1,20 metros e mínima de 1 metro. Os paxaros que compitan nunha mesma quenda estarán separados entre sí por unha distancia mínima de 5 metros.
5. Será obrigatorio que tódalas gaiolas leven tapado un lateral cunha tablilla ou celadeira que impida que os paxaros se vexan.



6. A cada paxaro participante serálle asignado un número que obrigatoriamente portara pegado na gaiola de xeito visible durante o transcurso da competición.
7. O tempo de colgada ou actuación de cadaunha das quendas será dun máximo de 12 minutos e un mínimo de 8 minutos dependendo do numero de participantes na proba, a criterio dos xuíces da competición e de acordo coa organización.
8. A Organización do campionato debera ter un tableiro para cada variedade; neles anotaranse a orde de actuación dos paxaros inscritos, a fin de que os participantes e afeccionados poidan seguir o desenrrolo da proba.
9. A organización deberá dispoñer dun equipo suficiente de colaboradores que serán os encargados de recoller, colgar, descolgar e devolver aos seus donos os paxaros participantes. Asemade, controlarán os números dos precintos dos paxaros participantes.
10. Dentro do recinto de enxuízamento solo poderá permanecer o persoal colaborador e os xuíces actuantes.

• **ENXUIZAMENTO:**

1. Os Xuíces de Campo puntuarán en base ao código de canto da Federación Galega de Caza, cumprimentando debidamente as planillas de enxuízamento.
2. Os Xuíces de Campo non poderán ser ao mesmo tempo participantes dos Campionatos de Silvestrismo da variedade e categoría que estean a vulgar pero sí poderán ser participantes noutras variedades e categorías que se celebren no mesmo Campionato.
3. A decisión ou resultado que formulen os Xuíces de Campo será inapelable.
4. Queda prohibido aos participantes e ao público en xeral dirixirse os Xuíces actuantes mentres estean a desenrrolar as súas funcións.

• **DESEMPATES:**

No caso de que dous ou máis paxaros da mesma variedade e categoría queden empatados a puntos nun Campionato desempatarase atendendo en primeiro lugar ás penalizacións, de xeito que quede primeiro o paxaro menos penalizado; no segundo lugar atenderase á Impresión, quedando diante o paxaro que acumule máis puntos no apartado da Impresión; de persistir o empate resolverase a chou.

• **FORMACIÓN DA SELECCIÓN GALEGA:**

1. A clasificación para o Campionato España de Paxariles poderán constar de varias fases (enténdase campionatos provinciais, galego, sociais, etc.)
2. Si se celebran un mínimo de 3 Campionatos clasificatorios cada paxaro participante podera rexeitar o peor resultado acadado, debendo participar como mínimo en dous clasificatorios; no caso de celebrarse dous clasificatorios será obrigatorio participar nos dous para ter opción de acudir á final do Campionato de España (clasificadorio provincial máis Final do Campionato Galego).
3. A final do Campionato Galego será o último Campionato puntuable da selección galega que disputará o Campionato de España. Para poder clasificarse para o Campionato de España será obrigatorio participar na final do Campionato Galego.
4. O baremo de clasificación para o Campionato de España será o seguinte, en tódalas fases previas clasificatorias. Para ser incluído neste baremo a puntuación mínima da planilla de enxuízamento será de 8 puntos por Campionato.

1º Posto: 25 puntos	9º Posto: 7 puntos
2º Posto: 20 puntos	10º Posto: 6 puntos
3º Posto: 16 puntos	11º Posto: 5 puntos
4º Posto: 13 puntos	12º Posto: 4 puntos
5º Posto: 11 puntos	13º Posto: 3 puntos
6º Posto: 10 puntos	14º Posto: 2 puntos
7º Posto: 9 puntos	15º Posto: 1 punto
8º Posto: 8 puntos	





- 5.** Quedará Campión Galego o paxaro vencedor en cada variedade e categoría na proba de campo da final do Campionato Galego.
- 6.** A cada paxaro participante seralle asignado un número de precinto que será a súa única identificación válida; dito precinto colocarse na primeira proba clasificatoria na que participe, e deberá permanecer ao longo das distintas fases nas que compita. Correspóndelle á organización da proba a colocación do devandito precinto, de xeito que impida a apertura da porta da gaiola. Calquera manipulación do precinto dará lugar a descalificación do participante.
- 7.** Ao Campionato Galego acudirán os paxaros que opten a clasificarse para o Campionato de España. Todo paxaro que acuda ao Campionato Galego sen precinto non terá opción de clasificarse para o Campionato de España.
- 8.** Poderán participar nos Campionatos as variedades de Xílgaro e Pardillo nas categorías de Novel e Adulto e os Verderolos nunha soa categoría (noveles e adultos xuntos). Nos híbridos das variedades mencionadas non haberá distinción entre noveles e adultos. Na categoría de Xirí non haberá campionatos mentres non se publique un código de canto desta especie.
- 9.** Se nunha determinada variedade a inscrición fose inferior a 4 paxaros pertencentes a un mínimo de 2 participantes o Xurado da competición citará á final de Campionato Galego aos exemplares inscritos; unha vez escoitados os paxaros presentados os xuíces deliberarán sobre a calidade de ditos exemplares e poderán:
 - a) Declarar deserta a clasificación nesa variedade.
 - b) Clasificar directamente ao exemplar ou exemplares que tivesen unha calidade mínima para participar na fase final de Campionato de España.
- 10.** Nas variedades onde se diputen as categorías de Novel e Adulto (xílgaro e Pardillo), clasificaranse para a final do Campionato de España os exemplares que acaden un maior número de puntos, según o baremo establecido no punto 4. En cada Campionato clasificatorio (tanto Campionatos Provinciais como Final do Campionato Galego) farase unha única clasificación, tanto de Xílgaro como de Pardillo, na que se ordenaran pola puntuación obtida, de maior a menor, os quince paxaros que máis puntos sumen na planillas de enxuízamento, independentemente de que participaran en noveles ou adultos.
- 11.** No caso de empate final, o desempate para determina-la clasificación para a formación da selección galega realizarase do seguinte xeito:
 - a) Según a clasificación na Final do Campionato Galego quedando por diante o que obtivese un mellor posto clasificatorio.
 - b) En caso de empate quedará por diante o que obtivese un maior número de puntos na planilla do Campionato Galego.
 - c) No caso de persistir o empate sumarase os puntos das planillas dos campionatos clasificatorios nos que puntúe (non se sumarán os puntos de clasificatorio que rexeite) quedando por diante o que sumase máis puntos.
 - d) De persistir o empate procederase a chou.
- 12.** Trala finalización do Campionato Galego e no prazo máximo de 3 días os propietarios dos paxaros con dereito a clasificarse para a Final do Campionato de España deberán nese momento acepta-la súa clasificación; no caso de non estaren presentes ou non avisar da súa aceptación considerarase que renuncian a dita clasificación cedendo o dereito ao propietario do paxaro clasificado a continuación.

NORMAS PARA OS CAMPIONATOS DE RASTRO DE XABARIL

- 1.** O Campionato Galego de Xabaril rexerese polo Regulamento da RFEC agás aquelas cuestións que figuren recollidas na presente Normativa de Competicións da FGC.
- 2.** Nas competicións de xabaril poderase participar con máis dun can agás no Campionato Galego no que cada participante deberá inscribirse unicamente cun can. Aqueles participantes que competiran con máis dun can nas probas previas –campionato provincial, Copa Galicia- deberán inscribirse no Campionato Galego co can co cal otiveran maior puntuación.
- 3.** O turno de competición para o primeiro can será por sorteo; os segundos ou terceiros turnos, se os houbera, serán a criterio do Director da Proba.





NORMAS PARA OS CAMPIONATOS DE CAZA CON ARCO

O campionato galego será de participación libre.

As presentes normas complementarán o actual regulamento de competicións de caza con arco para facilitar a realización das competicións.

1. Prepararanse propostas de competición individuais e comúns, as individuais prepararanas os participantes repartidos en cuadrillas e as comúns entre tódolos participantes. Posteriormente formaranse os grupos de competición dentro dos cales irá, alomenos, un participante de cada cuadrilla de formación de proposta, que será quen realice a proposta en último lugar, sendo xulgado por outro participante e quen explique e xulgue a proposta que preparou aos seus compañeiros de grupo de competición.
2. Cada participante preparará unha proposta e descoñecerá as propostas preparadas polos outros grupos, co que se garante a equidade na competición. Cada participante preparará sempre igual número de propostas que os demais.
3. O número máximo de puntos en xogo nas propostas individuais é de 40 e o mínimo de 20 para que non existan ventaxas na preparación das propostas. As propostas comúns non teñen límite de puntuación.
4. Para evitar erros nombrarase unha cuadrilla de preparación de proposta cun número (o da proposta) e a cuadrilla de competición cunha letra.
5. A distancia mínima de tiro a unha diana será de 0 metros e a máxima de 30 metros.
6. En categoría infantil considerarase unha distancia máxima de 15 metros. Nas probas que inclúan tempo de realización, tanto o tempo como a súa penalización afectará por igual a tódalas categorías.
7. Considérase que o animal "mira" ao participante, co cal non é diana impactable, no caso de dianas volumétricas de caza maior exclusivamente.
8. Está permitida a competición con calquera tipo de material nas frechas.
9. Se existen dianas defectuosas débese evitar a súa colocación, e se fose necesario o seu uso débese declarar ante tódolos participantes de forma previa á competición e intentar restrinxilo seu uso ás propostas comúns.
10. Nas propostas que inclúan dianas con movemento, este será uniforme en tódolos casos para garantir a equidade entre os participantes.
11. O uso de coitelas de caza nunha proba requirirá dunha especial observancia da seguridade na proposta. Permítese calquera modelo considerado de caza e no caso de disparo con coitelas retráctiles o participante abrirá a coitela antes de carga-la frecha sobre o arco para disparar.
12. Está prohibido portar teléfonos móbiles encendidos durante a competición.
13. As fichas cubriranse cos datos dos participantes por cadaún deles, incluíndo o nome completo e letra da cuadrilla. As puntuacións cubriranse por parte do xuíz e calquera defecto ou irregularidade nas mesmas determinará a anulación da tirada completa para o participante.
14. Nas dianas de caza maior, as zonas de puntuación consideraranse: 10 puntos o impacto dentro ou no círculo interno, 7 puntos no espazo determinado entre o círculo interno e o externo, ou no círculo externo mesmo, e 3 puntos o impacto en calquera outro lugar do animal.
15. A puntuación das competicións que se leven a cabo en Galicia suporán que o primeiro clasificado obteña 14 puntos, o segundo 11, o terceiro 9, o cuarto 7, quinto 6, sexto 5, sétimo 4, oitavo 3, noveno 2, e o décimo 1. A suma dos puntos das distintas competicións puntuables determinará os postos dos campións galegos. Dentre as competicións puntuables tomaranse os 3 mellores resultados de cada participante.
16. En caso de empate decidirase pola mellor ou mellores clasificacións acadadas nas distintas probas. De persisti-lo empate primará a puntuación obtida no campionato galego.





ANEXO I – COPA GALICIA

Normas comúns

1. A Copa Galicia é unha competición de probas puntuables.
2. Poderán realizarse competicións puntuables para a Copa Galicia de percorridos de caza, raposo, san huberto, cans de rastro sobre xabaril atrelado, cans de rastro sobre coello ou calquera outra que a Federación determine.
3. A Copa Galicia é de participación libre para calquera deportista federado que así o solicite.
4. A organización da Copa Galicia correrá a cargo das sociedades de caza e clubs federados de toda Galicia.
5. Os interesados na organización de competicións puntuables para a Copa Galicia deberán solicitalo á Federación Galega de Caza, a través das respectivas Federacións Provinciais, cun mes de antelación, agás Raposo cuxas solicitudes deberán constar no ente federativo con dous meses de antelación. A solicitude deberá contemplar a data, lugar de celebración, etc., debendo constar claramente no programa da proba a descrición "proba puntuable para a Copa Galicia"; non podendo coincidir na mesma data máis dunha proba da Copa Galicia da mesma modalidade.
6. Á vista das solicitudes recibidas para as distintas probas puntuables da Copa Federación, a FGC con 20 días de antelación remitirá a autorización correspondente á sociedade solicitante xunto cos impresos da acta, fichas e follas de inscricións, remitindo copia da citada autorización á Federación Provincial correspondente. Para que a autorización sexa efectiva o programa da competición deberá obrar na sede federativa con 15 días de antelación á celebración da proba.
7. Unha vez celebrada a competición puntuable, a sociedade organizadora, ao día seguinte da celebración da proba, remitirá á FGC, debidamente cumprimentada e asinada, a acta de resultados, fichas de puntuación, e folla de inscricións dos participantes.
8. Os xuíces e árbitros das distintas competicións puntuables serán designados pola FGC, previa petición da sociedade organizadora da proba, que será a encargada de aboarlles a dieta de arbitraje.
9. As probas puntuables para a Copa Galicia desenvolveranse conforme ao Regulamento da modalidade e Normas Complementarias da FGC.
10. As probas puntuables para a Copa Galicia non poderán coincidir con competicións oficiais de rango superior.
11. Puntuarán os 10 mellores clasificados de cada proba, conforme ao seguinte baremo :

CLASIFICACION	PUNTUACIÓN
1º	30
2º	27
3º	24
4º	21
5º	18
6º	15
7º	12
8º	9
9º	6
10º	3

12. As probas clasificatorias para a Copa Galicia poderán comezar o fin de semana seguinte da celebración do Campionato Galego da modalidade e rematarán o fin de semana anterior da seguinte edición.
13. Créase a figura de Responsable da Competición para as probas da Copa Galicia, éste será designado pola FGC, e terá entre as súas funcións velar polo bo desenrolo da mesma, así como emitir un informe de valoración da proba que remitirá á FGC.
14. Os deportistas para poder clasificarse pola Copa Galicia para o Campionato Galego deberán haber participado previamente no respectivo Campionato Provincial da modalidade, salvo causa de forza maior que deberá acreditar ante a Federación Galega de Caza, a vista do cal ésta resolverá.





Federación Galega de Caza

15. Os clasificados da Copa Galicia participarán directamente no Campionato Galego da modalidade. Cando algún clasificado da Copa Galicia xa estivese clasificado pra o Campionato Galego (coa súa Selección Provincial ou por se-lo campión da edición anterior) o seu posto será cuberto polo seguinte ou seguintes clasificados da Copa Galicia.

COPA GALICIA DE PERCORRIDOS DE CAZA

1. Os Campionatos Provinciais da modalidade poderán ser puntuables, se así o considera e solicita a Federación Provincial.
2. As probas puntuables para a Copa Galicia de Percorridos de Caza deberán celebrarse a un mínimo de 50 pratos.
3. Establécese unha categoría única na que se engloban tódolos participantes.
4. O Campeón recibirá o trofeo que o acredita como tal. Este trofeo consistirá na reprodución da Copa orixinal.
5. O gañador da Copa Galicia durante tres edicións recibirá a Copa Galicia orixinal en propiedade.
6. A clasificación da Copa Galicia realizarase tendo en conta as puntuacións finais acadadas nas probas puntuables, sobre o 60% dos pratos tirados, escollendo de cada tirador as mellores puntuacións, axustando a porcentaxe se non coinciden tiradas completas
7. No caso de empate decidirase pola mellor ou mellores clasificacións acadadas nas distintas probas. No caso de persistir dito empate desempatarase pola suma das segundas mellores puntuacións. De non ter unha segunda puntuación contarase coma cero puntos.

COPA GALICIA DE RAPOSO

1. Os Campionatos Provinciais non serán puntuables para a Copa Galicia.
2. A concesión por parte da FGC das diferentes probas puntuables realizarase de forma equitativa por provincia.
3. Solo puntuarán os 10 primeiros clasificados que abateran como mínimo 1 raposo ao longo da proba.
4. Resultará campión da Copa Galicia aquel concursante que acade máis puntos en 1/3 das probas celebradas. Cando 1/3 do total das probas celebradas sexa inferior a tres computaranse os resultados das tres mellores probas. Cando 1/3 non sexa número exacto redondearase por exceso (exemplo: si se celebraran 11 probas redondearíase a 4 probas).
5. No caso de empate decidirase pola mellor ou mellores clasificacións acadadas nas distintas probas, primeiro polas tres elixidas; si persiste o empate resolverase pola suma das segundas mellores puntuacións; de non ter unha segunda puntuación contarase coma cero puntos.

COPA GALICIA DE RASTRO DE XABARIL

1. Os campionatos Provinciais serán puntuables para a Copa Galicia.
2. Non puntuarán os cans pasivos.
3. Resultará campión da Copa Galicia aquel concursante que acade máis puntos en 1/3 das probas celebradas. Cando 1/3 do total das probas celebradas sexa inferior a tres colleranse os resultados das tres mellores probas. Cando 1/3 non sexa número exacto redondearase por exceso (exemplo: si se celebraran 11 probas redondearíase a 4 probas).
4. No caso de empate decidirase pola mellor ou mellores clasificacións acadadas nas distintas probas; no caso de persistir dito empate resolverase pola suma das segundas mellores puntuacións; de non ter unha segunda puntuación contarase coma cero puntos.

COPA GALICIA DE RASTRO DE COELLO

1. Os Campionatos Provinciais non serán puntuables para a Copa Galicia.
2. Resultará campión da Copa Galicia aquel concursante que acade máis puntos en 1/3 das probas celebradas, cun mínimo de dúas probas. Cando 1/3 non sexa número exacto redondearase por exceso (exemplo: si se celebraran 11 probas redondearíase a 4 probas).
3. No caso de empate decidirase pola mellor ou mellores clasificacións acadadas nas distintas probas; no caso de persistir dito empate resolverase pola suma das segundas mellores puntuacións; de non ter unha segunda puntuación contarase coma cero puntos.



Federación Galega de Caza

4. O Campión da Copa Galicia acadará praza para o Campionato Galego sempre e cando se disputen un mínimo de 4 probas puntuables.

COPA GALICIA DE SAN HUBERTO

1. Os Campionatos Provinciais non serán puntuables para a Copa Galicia.
2. Resultará campión da Copa Galicia aquel concursante que acade máis puntos en 1/3 das probas celebradas. Cando 1/3 do total das probas celebradas sexa inferior a tres computaranse os resultados das tres mellores probas. Cando 1/3 non sexa número exacto redondearase por exceso (exemplo: si se celebraran 11 probas redondearíase a 4 probas).
3. No caso de empate, desempatarase pola suma total das segundas mellores puntuacións; si persiste o empate irase á suma total de tódalas probas puntuables. Se aínda así continuara o empate resolverase polas mellores puntuacións acadadas no apartado de tiro, polo que os organizadores das diferentes probas puntuables deberán remitir á FGC xunto coa acta de resultados da proba, as tarxetas de puntuación asinadas polos xuíces. De ser necesario novo desempate realizarase pola mellor puntuación acadada polos cans nas diferentes probas puntuables.